

## — 327 —

der edeln herren, Margraf Heinrichs von Hachberg, pflegers der kinde vnseris herren herren Burckartes seligen von Üsenberg, Graf Cuonrates herren zuo Friburg, herren Heinrichs von Napolzstein herren zuo Hohennack, vnd herrn Huges herren von Üsenberg, der vorgevanten kinde von Üsenberg vattermage, vns verbunden han mit geschwornen eyden, die wir getan han zuo den heiligen, den bescheiden wisen lüten, dem rate vnd den burgern von Friburg in Brisgöw, also als hienach geschriben stat, das ist.. Das wir Endingen, Aegol vnd Höhingen, die drie vestinen vnd gemeinlich alles das darzuo höret, als es die herschaft von Üsenberg harbracht het, das herr Burckart seligen von Üsenberg was, vnd vns ingeentwurtet ist, weder den vorgevanten kinden von Üsenberg, so si zuo iren tagen komet, noch niemane an den es viele, die vestinen entwurten, noch ze herren nemmen sollen e das sich die verbinden vnd versichern, der stette ze Friburg, mit inen selb, vnd den vestinen, vnd mit der herschaft beholfen vnd geraten ze sinde eweklich, als der rate zuo Friburg, oder der mertheil des rates da erkennent ane alle geuerde. Vnd alle die wil das nüt geschehen ist, vnd wir keinen herren han, so sellent wir mit vns selben, mit den vestinan vnd allem so darzuo gehöret, inen beholfen vnd geraten sin getrülich, recht als der vorgevant rate von Friburg, oder der mertheil des rates erkennent ane alle geuerde, bi vnsern vorgevanten eyden. Vnd wer hiewider, oder wider kein dinge, das hie geschriben stat, sin wölte, wider den sönt wir vns setzen, vnd das wirste wider den oder die tuon, so wir können oder mögen, mit lip vnd mit guot, das dis furgang gewünne, vnd sön wir die von Endingen die vestinen besetzen, vnd behüten, mit wissende des rates von Friburg, ane iren schaden, vnd wem wir sū befehlen, der sol inen sweren, damitte beholfen vnd geraten ze sinde, vnd si vf vnd ab ze lassend, wa vnd wenne, vnd wie dicke sū wellent mit lüzgel oder mit vil ane alle geuerde. Vnd wir die vorgevantten herren alle, Marggraf Heinrich von Hachberg,